

**Meeqqat 18-inik ukioqalernissami tungaanut pisortat ingerlataannik angalatitsiviit aqqutigalugit angalasussaattillutik meeqqatut akeqalernissaat, aningaasatigut qanoq naleqassanersoq Naalakkersuisut misissuinissaannik Inatsisartut aalajangiiffigisassatut siunnersuut. Misissuineq meeqqat akikinnermik angalasarnerannut malittarisassat allanngortinnissaannik tunngaviliissaaq, kingusinnerpaammilu UPA2026-mi inatsisartunut saqqummiunneqassalluni. (Inatsisartunut ilaasortaq Jens NapātôK, Naleraq)**

**aamma**

**Soraarninngornikut pisortat ingerlataannik angalatitsiviit aqqutigalugit akikinnerusumik angalasinnaanerat ukioq naallugu atuutilerpat aammalu soraarnerussutisiaqartunut billetsit ukioq kaajallallugu killeqanngitsumik pisiassaasinnaalerpata, soraarnerussutisiaqartut akikinnerusumik angalasarnerannut malittarisassat allanngortinnissaat siunertaralugu, qanoq naleqassanersoq Naalakkersuisut misissuinissaannik Inatsisartut aalajangiiffigisassatut siunnersuut. Misissuineq kingusinnerpaamik UPA2026-mi inatsisartunut saqqummiunneqassaaq. (Inatsisartunut ilaasortaq Jens NapātôK, Naleraq)**

**pillugu**

**Sanaartornermut Ataatsimiititaliap**

**Siunnersuutip aappassaaneerpeqarneranut**

**ISUMALIUTISSIISUTAA**

Sanaartornermut Ataatsimiititaliaq suliarinninnermini ukuninnga inuttaqarpoq:

Ataatsimiititaliap suliarinninnermini ilaasortarai:

Inatsisartunut ilaasortaq Justus Hansen, Demokraatit, siulittaasoq  
Inatsisartunut ilaasortaq Gerth Mikaelson, Naleraq, siulittaasup tullia  
Inatsisartunut ilaasortaq Jørgen Rosbach, Demokraatit  
Inatsisartunut ilaasortaq Nivi Heilmann Efraimsen, Inuit Ataqtigiit

UKA 2025-imi ulloq 17. oktober siullermeerinninnerup kingorna ataatsimiititaliap siunnersuut misissorpaa.

### **Siunnersuutip imarisaa siunertaalu**

Immikkoortut UKA2025/171 aamma UKA 2025/172 siullermeerneqarneranni ataatsimoortillugit suliarineqarput. Tamanna tunngavigalugu immikkoortut taakkua marluk ataatsikkoortillugit ataatsimiititaliamit isumaliutissiissusiarineqarput. Meeqqat 18-inik ukioqalernissami tungaannut pisortat ingerlataannik soorlu Air Greenlandimik aamma Arctic Umiaq Linemik angalatitsiviit aqutugalugit angalasussaatillutik meeqqatut akeqalernissaat aningaasatigut qanoq naleqarnissaa pillugu Naalakkersuisut misissuinissamut peqquneqarput. Peqatigisaanik soraarninngornikut ukioq naallugu akikinnerusumik killeqanngitsumillu pisisinnaalernissaat misissorneqassaaq. Soraarnerussutisiallit pisortat ingerlataannik angalatitsiviit aqutugalugit akikinnerusumik angalasinnaanerat billetsinik killeqanngitsumik pisisinnaalerpata angalarnerannut malittarisassat allanngornissaat peqatigitillugu misissorneqassaaq. Misissuineq meeqqat aamma soraarnerussutisiallit akikinnermik angalasinnaanissaannut malittarisassat allanngortinnissaannut tunngavissiissaaq. Misissuineq kingusinnerpaamik UPA2026-mi Inatsisartunut saqqummiunneqassaaq.

### **Siunnersuutip Inatsisartuni siullermeerneqarnera**

Aalajangiiffigisassatut siunnersuummi siunnersuuteqartumit siunnertarineqartoq Inatsisartuni siullermeerneqarnera amerlammata taparserneqarpoq.

Nunatsinni angalanerup akisunera, innuttaasullu isertitakitsut ilungersunartumillu inuuniartut amerlasut partiinit tamanit isumaqatigineqarpoq.

Oqallinneq tunngavigalugu siunnersuut ataatsimiititaliamit suliarineqartussanngorlugu innersuunneqarpoq.

### **Allakkatigut apeqquteqaatit**

Ataatsimiititaliaq siunnersuummik suliaqarnermini Isumaginninnermut, Suliffeqarnermut, Ineqarnermut, Attaveqaasersuutitut, Isorliunerusunullu Naalakkersuisumut apeqqutitut arlalinnut akissuteqarnissaanik qinnuigaa. Ataatsimiititaliap apeqqutai Isumaginninnermut, Suliffeqarnermut, Ineqarnermut, Attaveqaasersuutitut, Isorliunerusunullu Naalakkersuisup akissutai isumaliutissiissummut uunga ilanngussatut 1-tut ilanngunneqarpoq.

### **Siunnersuutip aningaasatigut kingunerisassai**

Inatsisartut Suleriaasianni § 33, imm. 1-imi aalajangersarneqarpoq aalajangiiffigisassatut siunnersuutip timitalerneqarnerata aningaasatigut allaffissornikkullu kingunerisassai siunnersuummut tunngavilersuutini allaaserineqarsimassasut.

Siunnersuutip piviusunnngortinneqarnissaanut aningaasatigut kingunerisassat matumani allaneqarsimaneri siunnersuummut naapertuuttoq ataatsimiititaliamit maluginiarneqarportaaq. Taamaalilluni suliaqarneq ukiup affaa AC-mik ilinniarsimasup nalinganik, tassalu 250.000 kr.-nit sinnernaviannikkai naatsorsuutigineqarpoq.

### **Ataatsimiititaliap siunnersuummik suliaqarnera**

Nuummi mittarfissuup ammarnera Qaqortumi aamma Ilulissani atulersussat malitsigisaanik nunami allannngortoqartussaq ataatsimiititaliamit maluginiarneqarpoq.

Naalakkersuisut ataatsimiititaliap apeqqutaanut akissuteqarnermini, Sarfaq Ittuk atorsinnaassusaata killeqarnera pissutigalugu piffissami aggersumi angalasarunnaartussaammat ataatsimiititaliamit maluginiarneqarmat naggataatigut oqaatigineqassaaq. Naalakkersuisut angalasunik angallassinernup siunissami aaqqiivigineqarnissaa qulaajarlugu periarfissanillu aaqqiissutaasinnaasunik suliaqarnertik aallartereernikuuaat. Taamatuttaaq ilaasunik angallassinermi pingaarnerusutigut sunniutit Naalakkersuisunit utaqqimaarneqarput, taamaaliornikkut ilaasunik angallassinermi siunertamut tulluunnerpaamik suliniuteqarnissaaq aallartisarneqarsinnaaniassammat.

### **Ataatsimiititaliap inassuteqaatai**

- Ataatsimiititaliap isumaqatigiittup siunnersuutip akuersissutigineqarnissaa inassutigaa.
- Ilutigalugu ataatsimiititaliamut apeqqutigineqarsimasut qulaajarneqarnissaat pillugu misissuinissaa pineqartoq Naalakkersuisunit piaarnerpaamik aallartinneqassasoq kaammattuutigineqarpoq.

Taamatut oqaaseqaateqarluni isumaliutissiisummilu allassimasutut paasinnilluni  
ataatsimiititaliap siunnersuut aappassaaniigassanngortippaa.

---

Justus Hansen  
Siulittaasoq

---

Gerth Mikaelson  
Siulittaasup tullia

---

Jørgen Rosbach

---

Nivi Heilmann Efraimson